

PROGRAM DAN AKTIVITI DAKWAH NAHDLATUL ULAMA (NU) MASAKINI

oleh
Prof. Madya Dr. Ab. Aziz Mohd. Zin

Abstract

The article discusses the activities of NU which is the biggest da'wah organisation in Indonesia. The activities of NU covers almost all aspects of contemporary human life.

Pendahuluan

Banyak masalah yang dihadapi oleh masyarakat Indonesia masa kini, dan sebahagian besarnya lanjutan daripada masalah-masalah terdahulu yang belum selesai. Keadaan masyarakat Indonesia semamang menghadapi bermacam-macam masalah, samada masalah gugatan akidah, masalah moral, masalah kemiskinan, masalah Kristianisasi di kalangan orang Islam dan lain-lain.¹

Antara pertubuhan dakwah yang berusaha menangani permasalahan tersebut ialah Nahdlatul Ulama (ejaan asal bahasa Indonesia), yang merupakan salah sebuah pertubuhan dakwah yang terbesar dan terkemuka di Indonesia masa kini.

Banyak usaha yang dilakukan oleh NU, terutamanya untuk kesinambungan tradisi bermazhab. NU mengakui dan mengamalkan warisan aliran pemikiran *syafi'iyah* dan cuba mempertahankannya.

Kelahiran Nahdlatul Ulama

Sebelum Nahdlatul Ulama diwujudkan sebagai sebuah organisasi, latar belakangnya ialah bahawa para ulama di Indonesia telah lama berperanan sebagai pembimbing umat menuju tercapainya kemuliaan Islam dan umatnya. Mereka memberi pelajaran agama kepada masyarakat, mendidik guru-guru agama supaya dapat melanjutkan kebaktian guru-guru itu kepada masyarakat, samada melalui pondok, tabligh dan lain-lain.²

¹ Sila rujuk, Jurnal Usuluddin bil. 5.

² Nahdlatul Ulama, *Amal Bakti Nahdlatul Ulama Pada Agama Bangsa Dan Negara*, Harlah NU ke 57. NU. t.t.

Terdapat beberapa aliran pemikiran dalam gerakan dakwah di Indonesia, dan secara kasarnya ada aliran pemikiran tradisional yang mempertahankan ajaran-ajaran mazhab dan ada aliran pemikiran pembaharuan. Golongan tradisional dalam pemikiran Islam ini merasa perlunya suatu wadah perjuangan untuk mereka. Dari sini bermulalah perhimpunan-perhimpunan dan pembentukan kesatuan.³ Pada 31 Januari 1926 (16 Rajab 1344) satu pertemuan ulama terkemuka Indonesia telah diadakan di Surabaya dan hasil dari pertemuan tersebut terbentuklah Nahdlatul Ulama.⁴

Matlamat Nahdlatul Ulama

Anggaran dasar NU 1927 menyebut tujuan kelahiran NU, iaitu untuk memperkuat kesetiaan kaum muslimin kepada salah satu daripada mazhab 4 dan melakukan kegiatan-kegiatan yang menguntungkan para anggota, dalam bentuk berikut:

- Memperkuat persatuan antara sesama ulama yang masih setia terhadap ajaran-ajaran mazhab.
- Memberikan bimbingan tentang jenis-jenis buku yang diajarkan pada lembaga-lembaga Pendidikan Islam.
- Menyebarkan ajaran-ajaran Islam yang sesuai dengan tuntutan mazhab 4.
- Memperluaskan jumlah madrasah dan memperbaiki warga Indonesia.
- Membantu pembangunan masjid, surau dan pondok pesantren.
- Membantu mengurus anak-anak yatim piatu dan fakir miskin.⁵

Aktiviti Nahdlatul Ulama

Untuk menggerakkan aktiviti NU, empat bidang pokok dijadikan landasannya, iaitu:

- Bidang Agama
- Bidang Pendidikan
- Bidang Sosial
- Bidang Ekonomi

³ Prof. Dr. H. Harun Nasution, *Ensiklopedi Islam Indonesia*, Jakarta, 1992, h. 675.

⁴ Amal Bakti NU, *loc. cit.*

⁵ Nasution, *op. cit.* h. 725.

Dari sini terbentuklah lembaga, lujnah dan badan otonom.⁶

1. Lembaga. Bahagian-bahagian yang termasuk ke dalam lembaga ialah:
 - 1.1. Lembaga Dakwah. Lembaga ini mengadakan program yang bersangkutan dengan penyebaran Islam Ahli al-Sunnah Wal Jamaah.⁷ Ia juga melatih *du'at*, kajian-kajian dakwah, ceramah-ceramah dan khutbah Jumaat.⁸ Jadi, aktiviti yang dilakukan oleh lembaga dakwah ialah dalam rangka usaha mengembangkan dakwah, terutamanya dalam hal-hal dakwah umum.⁹
 - 1.2. Lembaga Pendidikan Ma'arif. Bahagian ini mengatur program di bidang pendidikan dan pengajaran, samada formal atau tidak formal, termasuk pondok pesantren.¹⁰ Dengan itu, pendidikan sekolah rendah yang jumlahnya lebih 5 ribu buah, pendidikan sekolah menengah, pendidikan Maahad dan pesantren yang jumlah kedua-duanya lebi 6 ribu buah, pendidikan di peringkat universiti dan pengajian tinggi yang jumlahnya lebih 10 buah berada di bawah lembaga ini.¹¹
 - 1.3. Lembaga Sosial. Lembaga ini melaksanakan program yang berhubung dengan pelayanan sosial dan kesihatan.¹² Projek yang utama lembaga ini ialah penjagaan anak yatim, rumah sakit bersalin, klinik dan balai perubatan.¹³
 - 1.4. Lembaga Kemuslihatan Keluarga. Lembaga ini mengatur program mengenai kemuslihatan keluarga, kependudukan dan lingkungan hidup.¹⁴ Selain daripada mengawasi kesihatan, lembaga ini mengatur aktiviti penerangan berhubung keluarga berencana, mencari jalan untuk memperbaiki kehidupan dan menangani permasalahan ibu hamil.¹⁵

⁶ Sekretariat Jendral PBNU. *Pedoman Penyelenggaraan Organisasi Nahdlatul Ulama*. SJPBNU, h. 15 - 16.

⁷ SJPBNU. *op. cit.*, h. 90.

⁸ K.H. Ma'arif Amin, Ketua Syuriah Bhg. Agama NU, Interview, di pejabatnya, pada 10.5.96.

⁹ Mohammad Fajrul Falaakh, wakil Ketua NU, interview, di pejabatnya, pada 11.5.96.

¹⁰ SJPBNU. *loc. cit.*

¹¹ K.H. Ma'arif, *loc. cit.*

¹² SJPBNU. *op. cit.* h. 91.

¹³ K.H. Ma'arif, *loc. cit.*

¹⁴ SJPBNU, *op. cit.*, h. 91.

¹⁵ Fajrul *loc. cit.*

- 1.5. Lembaga Pembangunan Dan Pengembangan Pertanian.
Program yang dilakukan oleh lembaga ini berhubung dengan pertanian, penternakan dan perikanan.¹⁶ Antara projek penting lembaga ini ialah projek-projek printis dan projek sekolah-sekolah pertanian.¹⁷
- 1.6. Lembaga Perekonomian. Lembaga ini mengatur program yang berhubung dengan pengembangan ekonomi ahli NU.¹⁸ Lembaga ini juga telah menubuhkan bank pengkreditan rakyat yang setakat ini berjumlah 14 buah.¹⁹
- 1.7. Lembaga Ta'mir Masjid. Lembaga ini bertanggungjawab kepada pembangunan dan pemakmuran masjid, termasuk ta'mir masjid, pembangunan dan pengurusan masjid.²⁰
- 1.8. Lembaga Hubungan Maahad Islam yang mengatur program untuk mengembangkan pondok pesantren.²¹
- 1.9. Lembaga Pencak Silat yang mengatur program pengembangan olahraga pencak silat.²²
- 1.10. Lembaga Pengembangan Tenaga Kerja yang mengatur program dan usaha pengembangan tenaga kerja.²³
- 1.11. Lembaga Seni Budaya yang mengatur program kesenian dan kebudayaan selain hadrah.²⁴
- 1.12. Lembaga Misi Islam yang mengatur program penyiaran Islam di daerah yang bersifat khusus.²⁵
- 1.13. Lembaga Ikatan Seni Hadrah yang mengatur program di bidang pengembangan seni hadrah.²⁶

¹⁶ SJPBNU, *loc. cit.*

¹⁷ K.H. Ma'arif, *loc. cit.*

¹⁸ SJPBNU, *loc. cit.*

¹⁹ K.H. Ma'arif, *loc. cit.*

²⁰ *Ibid.*

²¹ SJPBNU, *loc. cit.*

²² *Ibid.*

²³ *Ibid.*

²⁴ *Ibid.* h. 92.

²⁵ *Ibid.*

²⁶ *Ibid.*

2. Lujnah. Bahagian-bahagian yang termasuk ke dalam lujnah ialah:
 - 2.1. Lujnah Ta'lif wa al-Nasyr. Lujnah ini bertanggungjawab berhubung dengan penulisan dan penerbitan. Bentuk penerbitan, samada buku yang menerangkan tentang organisasi dan buku umum dalam isu-isu tertentu, majalah Tabloid bulanan yang memuatkan berita umum termasuk tentang masyarakat luar, dan risalah yang menerangkan tentang NU, program-program dan sebagainya.²⁷
 - 2.2. Lujnah Bahth Masail Diniyah. Lujnah ini berfungsi membahas dan memecahkan masalah-masalah agama yang berlaku untuk mendapat kepastian hukum.²⁸ Sesuatu masalah yang timbul yang melibatkan hukum syarak dibahaskan melalui lujnah ini, samada di peringkat pusat, provensi dan daerah. Selepas itu dibincangkan secara umum dalam muktamar atau perhimpunan umum untuk diambil keputusan.²⁹
 - 2.3. Lujnah Falakiyah yang mengurus masalah hisab dan rukyah.³⁰
 - 2.4. Lujnah kajian dan pengembangan sumber daya manusia yang mengurus kajian, penelitian peningkatan kualiti warga NU.³¹
 - 2.5. Lujnah Waqfiah yang mengurus, menghimpun dan mengelola harta wakaf milik NU.³²
 - 2.6. Lujnah penyuluhan dan bantuan hukum yang memberi pertolongan dan bantuan yang membabitkan perundangan kepada masyarakat, khususnya warga NU.³³
 - 2.7. Lujnah zakat, infaq dan sedekah yang berusaha menghimpun dan membahagikan zakat, infaq dan sedekah kepada yang berhak menerimanya.³⁴

²⁷ Fajrul. *loc. cit.*

²⁸ SJPBNU. *op. cit.*, h. 92 - 93.

²⁹ K.H. Ma'arif. *loc. cit.*

³⁰ SJPBNU. *op. cit.*, h. 92.

³¹ *Ibid.*

³² *Ibid.*, h. 93.

³³ *Ibid.*

³⁴ *Ibid.*

3. Badan Otonom. Bahagian yang termasuk ke dalam badan otonom ialah:
 - 3.1. Muslimat NU. Badan ini mengatur program-program dalam rangka mendidik kaum ibu NU untuk menjamin kemuslihatan mereka berkeluarga.³⁵
 - 3.2. Fatayat NU yang mengatur aktiviti untuk pemudi NU. Aktiviti-aktiviti ini dalam bentuk latihan-latihan kerja-kerja profesional, kerja-kerja tangan, di samping menangani masalah-masalah pemudi-pemudi.³⁶
 - 3.3. Gerakan Pemuda Ansar yang mengatur program latihan, kerja-kerja profesional kepada pemuda dan belia NU, di samping menangani masalah-masalah mereka.³⁷
 - 3.4. Ikatan Putera yang mengatur program-program untuk menangani kebajikan remaja.³⁸
 - 3.5. Ikatan Puteri-puteri yang mengatur program-program untuk menangani kebajikan puteri-puteri remaja.³⁹
 - 3.6. Jam'iyah Ahl Thariqah al-Mu'tabaroh yang mengatur program-program di kalangan ahli-ahli tariqat yang sesuai dengan ajaran Islam.⁴⁰ Antara aktiviti yang penting ialah mengadakan perhimpunan lima tahun sekali, tahunan dan sebagainya untuk merapatkan hubungan antara kumpulan-kumpulan tariqat dan NU.⁴¹
 - 3.7. Jam'iyah Qurra wa al-Huffaz yang menyusun program-program bagi kepentingan qari-qari atau qariah-qariah dan hafiz-hafiz al-Quran.⁴²

Pendedahan di atas menunjukkan bahawa aktiviti dakwah NU sangat luas dan mencakupi banyak lapangan hidup masyarakat.

³⁵ K.H. Ma'arif, *loc. cit.*

³⁶ *Ibid.*

³⁷ *Ibid.*

³⁸ SJPBNU, *op. cit.*, h. 89.

³⁹ *Ibid.*, h. 90.

⁴⁰ *Ibid.*

⁴¹ K.H. Ma'arif, *loc. cit.*

⁴² SJPBNU, *op. cit.*, h. 90.

Pendekatan Baru

Pendekatan baru NU yang penting sekarang ialah NU tidak lagi campur politik, iaitu sejak kira-kira tahun 1984. NU cuba kembali kepada dasar asalnya, iaitu ketetapan 1926 yang mana NU adalah pertubuhan dakwah sahaja.⁴³

Sebab NU berbuat demikian untuk mengelak perpecahan dan ketegangan, terutamanya dengan pemerintah, di samping kerana akhir-akhir ini parti politik Islam sudah tiada lagi di Indonesia. Jadi, pendekatan sekarang adalah pendekatan dakwah semata-masa bukan pendekatan politik.⁴⁴

Dari sudut penumpuan sasaran, walaupun pada dasarnya ditumpukan kepada semua golongan sasaran, namun dari sudut pelaksanaannya aktiviti NU lebih terjurus kepada masyarakat awam yang biasa sahaja.⁴⁵

Kejayaan terakhir: NU telah menempah beberapa kejayaan terakhir, iaitu seperti berikut:

1. Dapat memberi penumpuan kepada dakwah dan pendidikan, kerana serangan-serangan liar, terutamanya dari pihak orang politik tiada lagi.⁴⁶
2. Keterbukaan pemikiran NU dan tidak kaku kepada sesuatu persoalan sahaja. Apa sahaja persoalan baru yang timbul dapat diselesaikan dengan fikiran yang terbuka.⁴⁷
3. Dapat mengadakan Ma'ahad al-'Ali untuk mencetak ulama, dengan didedahkan ilmu-ilmu untuk melayakkan mereka menjadi ulama.⁴⁸
4. Mewujudkan bank pengkreditan rakyat untuk pengembangan ekonomi.⁴⁹
5. Mengadakan halaqat/seminar dalam lingkungan pesantren untuk mendedahkan isu-isu baru yang perlu diketahui oleh pelajar di pesantren.⁵⁰
6. Mengadakan lembaga pengembangan sumber daya manusia, iaitu satu projek pengembangan wawasan keulamaan untuk melatih kiyai-kiyai muda.⁵¹

⁴³ Bapa Mohyiddin Abu Rosman, Wakil Sekretari Jenderal NU, interview, di pejabatnya, pada 10.5.96.

⁴⁴ K.H. Ma'arif. *loc. cit.*

⁴⁵ Pak Mohyiddin. *loc. cit.*

⁴⁶ *Ibid.*

⁴⁷ K.H. Ma'arif. *loc. cit.*

⁴⁸ *Ibid.*

⁴⁹ *Ibid.*

⁵⁰ *Ibid.*

⁵¹ *Ibid.*

Masalah Dalaman

Kewangan atau kekurangan dana masih menjadi masalah utama kepada NU, sehingga dengan itu bolih membantutkan aktiviti NU yang kian meluas.⁵² Di samping dana ialah masalah sumber daya manusia, iaitu kekurangan penglibatan masyarakat berbanding dengan betapa ramainya masyarkat Indonesia dan kemampuan kerja yang terhad di kalangan anggota NU. Di samping itu, masalah juga timbul disebabkan masih adanya taasub dan keinginan merebut kepentingan untuk diri sendiri di kalangan anggota NU.⁵³

Strategi Terbaru

Tidak banyak strategi baru yang diperkenalkan oleh NU, selain daripada perkara kecil, iaitu mengutamakan dakwah dan pendidikan dalam era yang agak tenang seperti sekarang supaya segala program dalam bidang-bidang tersebut dapat berjalan dengan baik.⁵⁴

NU juga sedang mengembangkan pendidikan kekeluargaan supaya nanti mereka mampu menyumbang yang dengan itu diharapkan masalah dana dan sumber daya manusia dapat diatasi.⁵⁵

Kesimpulan

NU merupakan pertubuhan dakwah di Indonesia yang melaksanakan tanggungjawab dakwah mengikut pendekatan yang difikirkan sesuai. Aktiviti dakwah NU mencakupi dalam bidang yang sangat luas, terutamanya bidang pendidikan. Namun, masih banyak kelemahan yang dihadapi oleh NU yang memerlukan penyelesaian segera, supaya ia dapat melaksanakan misinya dengan lebih baik dan berkesan.

Rumusan Dapatan Kajian:

Kajian ini menghasilkan beberapa dapatan dan rumusannya adalah sebagaimana berikutny:

1. NU telah sampai kesuatu tahap yang maju, kerana aktiviti-aktiviti dakwah yang menyeluruh dalam aspek kehidupan manusia.

⁵² K.H. Ma'arif, *loc. cit.* dan Pak Mohyidden, *loc. cit.*

⁵³ *Ibid.*

⁵⁴ *Ibid.*

⁵⁵ K.H. Ma'arif, *loc. cit.*

2. Dakwah NU bukan semata-mata tabligh, tetapi penyelesaian masalah umat dalam segenap lapangan hidup.
3. Bidang pendidikan, samada di peringkat rendah atau di peringkat tinggi diberikan penumpuan khusus oleh NU.
4. Dakwah yang baik ialah usaha yang berjalan serentak dalam pembinaan kemantapan akidah, tarbiyah, perekonomian, sosial dan lapangan-lapangan hidup yang lain.
5. Dakwah yang baik ialah dakwah yang tidak cuba mencari pertembungan dengan mana-mana pihak, terutamanya pihak pemerintah, sebab kerugian akibat pertembungan sukar untuk diatasi.
6. Dakwah yang mendapat perhatian masyarakat ialah dakwah yang peka kepada permasalahan masyarakat dan cuba menyelesaikan dengan pendekatan Islam yang bersepadu.
7. Masalah dana, masalah penyertaan orang ramai dan masalah kelemahan pengurusan organisasi menjadi masalah utama kepada NU.
8. Antara strategi dakwah NU masa ini, ialah cuba berbaik-baik dengan semua pihak, termasuk pihak pemerintah. Strategi tersebut boleh menghilangkan tekanan dan konfrantasi.
9. Antara *ustub* dakwah masa kini NU ialah tidak masuk campur dalam politik atas nama pertubuhan, walaupun masih menangani isu-isu politik dan memberi kebebasan kepada ahli bergerak dalam politik. *Ustub* tersebut boleh menghilangkan perpecahan di kalangan ahli.

